

Biologinut ikiortitut ilinniartitaaneq pillugu Namminersornerullutik Oqartussat nalunaarutaat

Inuussutissarsiutigut ilinniartitaaneq, ilinniagaqarnermut tapiissutit inuussutissarsiutinullu tunngasunik siunnersuineq pillugit Inatsisartut peqqussutaanni nr. 1-imi 4. maj 1990-imeersumi § 1, imm. 3, naapertorlugu aalajangersarneqarput:

Kapitali 1

Siunertaa sivilissusialu

§ 1. Ilinniartitsinerup siunertaraa ilinniartut biologinut ikiortitut sulinissamut atuakkatigut ilinniarnikkut sulinikkullu, pingaartumik immami uumasunik misissuinnermut tunngasutigut, kiisalu biologiimut tunngasutigut paasissutissanik nammineerluni katersuisarnissamut nalunaarsuisarnissamullu pikkorissarneqarnissaat.

§ 2. Ilinniartitaaneq ukiunik marlunnik sivilissuseqassaaq, avinneqarluni ukiumik ataatsimik sivilissusilimmik ilinniarfimmiiinnermik aamma pikkorissarluni sulillunilu ukiumik ataatsimik sivilissusilimmik Kalaallit Nunaanni Aalisakkanik Misissuisoqarfimmiiinnermik imaluunniit allami, ilinniartitaanermi ataatsimiititaliap akuerisaani, ilinniarfullunilu suliffimmiiinnermik.

Kapitali 2

Tiguneqarnissamut piumasaqaatit

§ 3. Ilinniartitaanermut tiguneqarsinnaapput inuit:

- 1) aalisakkerisutut ilinniarsimasut imaluunniit
- 2) ilinniarnertuunngorniarfimmii ilinniarsimasut.

Imm. 2. Tiguneqarsinnaapputtaaq inuit allamik ilinniagaqarsimasut, ilinniarsimanerat minnerpaamik uani piumasarsaasutut sivilissuseqarsimappat aamma brancheudvalgip isumaa malillugu biologinut ikiortit ilinniartitaanerannik naammassinninnissamut tunngavissanut allanut naapertuuttumik tunngavissaqalersitsissappat.

Imm. 3. Irsinnaatitaanermik killilersuineq pillugu Kultureqarnermi, Ilinniartitaanermi Suliffeqarnermilu Pisortaqarfik erseqqinnerusunik maleruagassaliorsinnaavoq.

Kapitali 3

Ilinniartitaanerup imaa

§ 4. Biologinut ikiortitut ilinniartitaanerup immikkoortuata siulliup assigissavaa aalisakkerisuunertut ilinniarnernup ukiuisa siullianni ilinniartitaaneq.

§ 5. Ilinniarnernup ukiuani siullermi (semesterit siullianni aappaannilu) lektionit 1440-t atorpeqassapput fagini ukunani ilinniartitsinermut:

- 1) aalisakkerineq..... lektionit 540
- 2) akoorutissat atorlugit eqqiluisaarneq uumasuaqqanillu tappiorannartulerineq..... lektionit 280
- 3) aalisarneq aalisakkanillu ilisimatusarneq..... lektionit 160
- 4) matematikki statistikkilu..... lektionit 140
- 5) qarasaasialerineq..... lektionit 80
- 6) sulineramik siulersuineq/aaqqissuineq. lektionit 80
- 7) atassuteqaqatigiinneq..... lektionit 80
- 8) timersorneq..... lektionit 80

§ 6. Fagini ataasiakkaani ilinniartitsinerup siunertaa imarisaalu tassaapput:

1) **Aalisakkerineq.**

Ilinniartup aalisakkat tarajugaanngitsut pitsaassusiinut ajorsiaassusiinullu tunngasunik allanillu aalisakkap (nerpiata) ajorsiaartortarneranut sunniuteqartartunik paasinnitsinnissaa. Aammattaaq ilinniartup paasinninnissaa aalisakkat nioqqutissat nerisassiassatut pitsanngorsarlugit qerititseriaatsimik asiutsaaliueriaatsinillu, aammalu sulinermi periaatsinik, pissarsianik inatsisinillu eqqortumik atuinissap pitsaassusissanillu nakkutilliinerup pingaaruteqassusiannik.

2) **Akoortutissat atorlugit eqqiluisaarneq uumasuaqqanillu tappiorannartulerineq.**

Ilinniartup paasisimaqqaagassanik uumasuaqqanik tappiorannartunik akoorutissanullu tunngasunik ilisimasaqarluarneq aqqutigalugu inuussutissalerinermi eqqiluisaarnissamut maleruagassanik paasinninnissaa eqqortumillu atuisinnaalernissaa.

3) **Aalisarneq aalisakkanillu ilisimatusarneq.**

Ilinniartup immami uumasut avatangiisaasalu sunniivigeqatigiittarnerannik (økologi) ilisimasaqalernissaa aammalu isumalluutit angallatit atorlugit piniarneqarsinnaasut sapinngissamik pitsaanerpaamik iluaqutiginiarneqarnissaannut paasinnikkiartornissaa.

4) **Matematikki statistikkilu.**

Ilinniartup matematikkimi tunngaviumik paasisimasassanik, kisitsisilerinermik atortunillu, kisitsisit atorlugit statistikkiliornermi atortartunik paasinnissutigalugillu atuisinnaalissutigisassaminnik, sungiusarneqarnissaa.

5) **Qarasaasialerineq.**

Ilinniartup maskiinat qarasaasiat sunulluunniit atorpeqartarnerannik paasisimasaqalersinniarnissaa kiisalu naqitassalerissutip kisitsissutillu atortarnerinik paasisaqartinnissaa.

6) **Sulineramik siulersuineq/aaqqissuineq.**

Ilinniartup inuit akornanni pissusiusartunik suleqatigiinnermut siulersuinernullu sunniuteqartartunik paasinninnissaa kiisalu suleqatigiinnermi siulersuinermilu periaasiusartunik ilitersorneqarlunilu sungiusarneqarnissaa.

7) Atassuteqaqatigiinneq.

Ilinniartup demokratii tunngavigalugu ingerlatsineri periaatsinik ilitsersorneqarnissaa allanullu atassuteqarluarsinnaanngorsarnissaa.

8) Timersorneq.

Ilinniartup timip siunertarisamut naapertuuttumik qasulissutissarinngisaminillu atornissaanik ilinniartinnissaa kiisalu timersuutiniq tamanik sungiusarnissamik paasisaqarnissaa suleqatigiinnermullu sungiusarneqarnissaa.

§ 7. Ilinniarnernup ukiuata aappaani ingerlanneqassaaq pikkorissartarneq sungiusarlunilu suliffimmiittarneq sap. akunnerinik 45-nik sivissuseqartumik.

Imm. 2. Sap. akunnerini siullerni 40-ni ilinniartup fagini makkunani sammisassat ingerlatissavai:

- 1) biologii tamanut tunngasoq sap. ak. 2
- 2) kinguppannik misissuiartorluni angalaneq sap. ak. 6
- 3) angallammik aalisakkanik misissuiart. sap. ak. 4
- 4) misissugassanik nalinginnaq tigusineq sap. ak. 4
- 5) qarasaasialerineq sap. ak. 4
- 6) aalisakkanik ilisimatusarneq aamma immat il.il. pissusiinik misissuineq (hydrografii) sap. ak. 4
- 7) laboratoriami periaaseq sap. ak. 4
- 8) atortunik/piniutiniq ilinniarneq sap. ak. 2
- 9) miluumasut imarmiut sap. ak. 2
- 10) qarasaasialerineq sap. ak. 6
- 11) statistikki sap. ak. 2

Imm. 3. Sap. akunnerini 5-ni kingullerni ilinniartut immikkut ilinniarlugu sammisimasaminnik allaaserinnissapput.

§ 8. Fagini ataasiakkaani atuakkatigut sulinikkullu ilinniartitsinerup kiisalu ilinniarnernup ukiuata aappaani immikkut ilinniagassaqartarnerup siunertarai:

1) Biologii tamanut tunngasoq.

Ilinniartut imarmiunut assigiinngitsunut (aalisakkanut, planktoninut, immap natermiunut) kiisalu tamanut tunngatillugu anatomiimik, fysiologiimik økologiimillu ilisimasaqalernissaat.

2) Angallammik kinguppannik misissuiartorneq.

Ilinniartut: angallammik aalisakkanik misissuummik angalaartarnissaat namminnerlu takullugit (peqataaffigalugillu) ilisimasaqalernissaat misissueriaatsimik, aalisakkat suunerinik, ilisimatuutut misissugassanik katersuinerimik, atortussat/piniutit suut atorineqarnissaannik, aalisariaatsinik, journalimut allattuinerimik, hydrografimik biologiimillu. Tamatigut kinguppaat eqqarsaatigalugit.

3) Aalisakkanik misissuiartorluni angalaneq.

Ilinniartut namminneq takullugit 2)-mi taaneqartunik ilisimasaqalernissaat, aalisakkalli eqqarsaatigalugit.

4) Misissugassanik nalinginnaq tigusineq.

Ilinniartut nammineq takullugu ilisimasaqalernissaat nioqqutissiassanik aalisarnermi pisanit nunaligussanillu misissugassanik nioqqutissiassat akornannit tigusisarnermik, tamatumunnga ilanngullugu pisat takissusiinik, oqimaassusiinik, qassinik ukioqarnerinik suaassusiinillu nalunaarsuisarnermik.

5) Qarasaasialerineq.

Ilinniartut ilinniartinneqarnissaat aqutsinermit periaatsinik, naqitassialerissummik, kisitsissummik aamma programminik kisitsisit atorlugit nalunaarsuusiornermut atortussanik atuinermit.

Ilinniartitsissutigineqassapputaas ilisimatuutut paasisanik databasemut immiullugit nalunaarsuineq aamma nalunaarusianik suliallu inernerinik qarasaasiamiit allaganngortitsisarneq.

6) Aalisakkanik ilisimatusarneq aamma immat il.il. pissusiinik misissuineq (hydrografi).

Ilinniartut aalisakkanik ilisimatusarnermi teoriimik periaatsimillu kiisalu hydrografiut tunngasunik tamakkualu immat pisuussutininik uumassusilinnik peqarnerannut sunniuteqartarnerinik ilisimasaqalersinnissaat.

7) Laboratoriami periaaseq.

Ilinniartut aalisakkanik misissuinermit laboratoriami immikkut periaatsinik (qassinik ukioqarnerisuiuermit, aqajarormiunik misissuinermit il.il.) ilinniartinneqarnissaat.

8) Atortunik/piniutinik ilinniarneq.

Ilinniartut nioqqutissiassanik aalisarnermi ilisimatuutullu misissuilluni aalisarnermi piniutit atornerinik, qanoq atorluarsinnaatiginermit suusariaqarnerinillu ilisimasaqalernissaat.

9) Miluumasut imarmiut.

Ilinniartut miluumasunik assigiinngitsunik tamakkunanngalu pisunik ilisimatuutut misissugassanik katersuinermit, tamatumunnga ilangullugu paasissutissanik piniartunit katersuinermit, ilisimasaqalernissaat.

10) Statistikki.

Ilinniartut kisitsisit atorlugit nassuiaasiornermik (statistikkimik) nalinginnaasumik, naatsorsueriaatsinik titartakkallu atorlugit paasissutissuinermit ilinniartinneqarnissaat.

11) Immikkut ilinniagaq.

Ilinniartut ornitaminni paasissutissanik katersinermit (misissugassanik pisat akornannit katersinermit, misissuilluni aalisarnermit) namminneerlutik siulersuinissaat, kingornatigullu tamakku edb atorlugu nalunaarsorlugit paasisatillu allaganngorlugit nalunaarusiaralugit.

§ 9. §§ 5-imi 7-imilu aalajangersakkanit allaanerussuseqartitsigallarnissaq brancheudvalgip akuerisinnaavaa.

§ 10. Pisariaqartitsineq malillugu naammattusaammik ilinniartitsinissaq innersuussutigineqarsinnaavoq.

§ 11. Ilinniartut ilinniartitsinermit najuuttussaataapput.

Imm. 2. Pisortaqaarfik najuuttussaataitanermut maleruagassaliorsinnaavoq.

§ 12. Ilinniartoq ilinniartitsinermit qanoq pissarsiaqarsimanersoq ilinniarfuup akuttunngitsunik misilittassavaa ilinniarnedanilu siunnersorneqarnissaanik neqeroorfigissallugu.

Kapitali 4

Misilitsinnerit soraarummeernerlu

§ 13. Ilinniarnernup ukiuisa siulliata naanerani fagini ukunani angusaat karakterilerneqassapput:

- 1) akoorutissat atorlugit eqqiluisaarneq uumasuaqqanillu tappiorannartulerineq kiisalu
- 2) aalisarneq aalisakkanillu ilisimatusarneq.

§ 14. Ilinniarnernup ukiuisa siulliata kingornatigut aalisakkat suliarineqartarnerannik fagimi soraarummeerneq pissaaq.

§ 15. Soraarummeerneq § 14-imi taaneqartoq allattariarsornerusinnaavoq oqaluttariarsornerusinnaallunilu.

Imm. 2. Soraarummeerneq ataatsimut katillugu karakterilerneqassaaq.

§ 16. Ilinniarnernup ukiuisa aappaata kingornatigut immikkut ilinniagaq, tak. § 7, imm. 3, oqaluttariarsorluni soraarummeerutigineqassaaq.

Imm. 2. Soraarummeerneq ilinniartup ilinniartitsisullu akornanni minutsini 15-ini oqaloqatigiinnerussaaq, oqaloqatigiinnermi tassani ilinniartoq atuagarsornikkut ilinniakkanik immikkut ilinniagaa aallaavigalugu apersorneqassalluni. Censori ilinniartitsisup apeqqutaasa saniatigut aperisarsinnaavoq.

§ 17. Angusani soraarummeernermilu karakteriliinermi 13-skala atorneqassaaq, tak.

Inuussutissarsiutitigut ilinniartitaanerni ilinniagaqartut atugaat pillugit Namminersornerullutik Oqartussat Nalunaarutaanni nr. 51-imi 20. december 1990-imeersumi § 28.

Imm. 2. Ilinniartup biologinut ikiortissatut ilinniartitaaneq angusiffigissaguniuk §§ 14 aamma 16 malillugit soraarummeernerni tamani minnerpaamik karakteri 6 karakterigisimassavaa.

Imm. 3. §§ 14-imi 16-imilu taaneqartuni soraarummeernerit fagini taakkunani ilinniartitsisumit kiisalu pisorta qarfiup censoriutitaanit nalilerneqarlutik.

Imm. 4. Naliliinermi isumaqatigiinngitsoqartillugu karakteriliussat marluk agguaqatigiissinnerat atorneqassaaq, taanna kisitsisaappat ilivitsoq. Kisitsit taanna karakterit skalamiittut marluk akornanniippat, censorillu karakteriliussaa anneruppat, kisitsimmut ilivitsumut qaninnermut qaffanneqassaaq, kisitsimmulli ilivitsumut qaninnermut appartinneqassalluni censorip karakteriliussaa minneruppat. Karakterili "0" karakteriliunneqassaaq taamatut karakteriliinissaq ilinniartitsisup censorillu isumaqatigiissutigippassuk.

§ 18. Ilinniartup soraarummeerneq peqataaffiginngippagu angusiffiginngippaguluunniit, taava ilinniartoq taanna soraarummeerfusumi tassani marloriarluni soraarummeeqqittussanngortinneqarsinnaavoq.

Imm. 2. Ilinniartitaanermi ataatsimiititaliap imm. 1-imi pisinnaatitsineq atunngitsoortissinnaavaa.

§ 19. Ilinniartunut uppersaatissaqartinneqartumik napparsimanermik imaluunniit allamik akornutissaviusumik pissuteqartumik siumut aalajangeriikkamik soraarummeeqataasimanngitsunut napparsimasunut naatsorsuussamik soraarummeersitsisoqarsinnaavoq.

Imm. 2. Napparsimasunut naatsorsuussamik soraarummeerneq ingerlanneqassaaq kingusinnerpaamik siumut aalajangeriikkamik tullianik soraarummeertoqalerpat.

Kapitali 5

Ilinniarsimanermut uppersaasaat

§ 20. Ilinniartuq ilinniarnerninik naammassinnereeruni soraarummeernermilu angusereeruni ilinniarsimanermut uppersaasaammik tunineqassaaq, tassanilu allassimassapput angusinermit soraarummeernermilu karakterit, tak. §§ 13, 14, aamma 16.

Imm. 2. Aammattaaq ilinniartup piffissamik sianiginninnera, soqutiginninnera qanorlu suleqataajumatigissusia naatsumik oqaaseqaatigineqassapput.

Imm. 3. Ilinniartuq ilinniarsimanermut uppersaasaasiussaaq.

Imm. 4. Uppersaasaatip qanoq suliarineqarnissaa pisortaqaarfiup maleruagassaliussavaa.

Kapitali 6

Aalajangersakkat assigiinngitsut

§ 21. Aalisakkanik suliffissuaqarnermut tunngasunut ilinniartitaanermi ataatsimiititaliaq biologinut ikiortitut ilinniartitaanermut ilinniartitaanermi ataatsimiititaliatut atussaaq.

§ 22. Nalunaarut una malillugu pissutsit ilinniarnermut tunngasul; pillugit ilinniartuq aalajangiinerinut naammagittaalliutit ilinniartitaanermi ataatsimiititaliamut suliasannngortinneqarsinnaapput ullormit aalajangiinerup aalajangiiffigineqartumut nalunaartigineqarneranit sap. ak. sisamat qaangiutsinnagit.

Imm. 2. Nalunaarut una malillugu pissutsit ilinniarnermut tunngasuunngitsut pillugit ilinniartuq aalajangiinerinut naammagittaalliutit pisortaqaarfiup suliasannngortinneqarsinnaapput ullormit aalajangiinerup aalajangiiffigineqartumut nalunaartigineqarneranit sap. ak. sisamat qaangiutsinnagit.

§ 23. Pisortaqaarfiup ilinniartitaanermi ataatsimiititaliap inassuteqarnera malillugu nalunaarummi uani aalajangersarneqartut sanioqqunneqarallarnissaat akuersissutigisnaavaa tamanna ineriartortitsiniarluni sulinerup ilaatut isigalugu.

§ 24. Nalunaarut una atortuulerpoq 1. august 1992, atortussaassalluni ukiumi ilinniartitsiffiusumi 1992-93-imi.

Imm. 2. Pisortaqaarfik ilinniartunut ukioq ilinniartitsiffiusumi 1992-93 sioqqullugu biologinut ikiortitut ilinniarnerninik aallartitsisunut malittarisassanik ikaarsaariarnermi atugassanik aalajangersagaliorsinnaavoq.

Namminersornerullutik Oqartussat, ulloq 23. april 1992.

Marianne Jensen

/

Aqigssiaq Møller

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut